

L'indipendenza di l'idrogenu.

L'affare hè cuminciatu cusì : u primu fù l'Atlanticu à di à u so vicinu l'Indianu:

- Avà basta, ognunu si stà in mare soiu, ùn vogliu più nè scambii d'acque nè di pesci ! dumandu u rispettu di a mio in-di-pen-den-za!

-Postu ch'ella hè cusì, si sò dette l'onde Pacifiche, l'Artiche è l'Australe, noi dinù vulemu dichjarà a nostra indipendenza! Ùn c'imbulighjemu più!

E di chjode cun lege speciale tutti i canali è tutte e bocche a u trafficu di pesci è di battelli.

I pesci ùn la capianu tantu sta scelta d'indipendenza, per elli l'acque eranu di tutti è tuttu u mondu avia u dirittu à campacci, ma basta ch'elli franchessinu u Capu di Bona Speranza o u Panama pè sentesi di:

- Ùn ai nunda à fà quì ! Vaitine ind'è tè!

Ci vole à sape chì i pesci cum'è l'omi, da sempre sò migranti sia per manghjà sia per ripruducesi, è qualchì volta ancu per spassighjà.

Tandu unepochi di pesci sò smariti è l'omi chì elli manghjavanu i pesci di lagnassi d'ùn pudè più piscà.

Ma l'uceani ùn vulianu sente nunda, ognunu in e so limite !

«Acque è pesci strangeri fora!» ughjulavanu l'armate di l'onda ; cusì m'anù contu u pocu di marinari vultati da viaghju.

Tuttu pudia piantà quì ma a frebba secessiunista curria sempre è parà ùn si pudia.

Figuratevi ch'ogni mare hà vulsutu dinù pratende à a so sbetica vuluntà d'indipendenza.

U Tirrenu disse à u Mediterraniu :

- Stattine à carrezza e to sponde, chì, eiu sò un mare supranu è ùn mi vogliu più mischià cun tè.

-Tandu noi dinù, si dissenu u mare Rossu è u mare Neru, più nimu francherà e nostre cunfine !

Ùn eramu più à chjachjare,è ognunu di chjode i so canali è e so bocche è tutti in mare soiu !

E torna à Vignale chì i pesci chjosi in porti senza più nunda à manghjà si morsenu tutti, anchjuve, mazzardi, ragnole, sarrachi, pesci rossi, infine ch'ùn ci firmava più nunda.

I battelli di pesca inchjudati à e calate o sdraiati nant'à u rinaghju s'annuiavanu.

S'annuiavanu dinù i marosuli ch'ùn pudianu più andà à corre aldilà di i so termini.

Voi cridite chì l'affare fussi finitu ? Invece ùn eramu ancu à cumincià .

Un bellu ghjornu, hè accadutu qualcosa d'ancu più stranu.

Eccu chì l'idrogenu, quellu di a formula H₂O, si discitò è disse:

- Essendu magiuritariu, dui contr'à unu, dumandu anch'eiu à esse indipendente è à decide tuttu seraghju eiu !

- Guarda disse l'ossigenu, insieme simu l'acqua di a terra, femu nasce vite è campà ghjente, Sì u più forte ma senza mè, qual'hè chì sà?

- Ùn vole di ! Eiu primura di tè ùn ne aghju !

E cusì fù dichjarata ancù per ellu a so santa indipendenza .

Vi possu dì chì tuttu u mondu l'hà intesa quella dichjarazione!

U lindumane quand'ellu hè spuntatu u sole, rimori strani cullavanu da e prufundezze,
è pò si sò mossi venti scemi à mandà tuttu in pulvina.

Finchè, à mezu di ssu mughjulime, u celu si carchessi di rufuloni grisgi .

Paria ghjunta l'apocalisse.

In fine chì a v'averete capita tutte l'acque si sò svapurite .

Di ssi mari è di ssi oceani, hè firmatu solu un disertu prufondu è bughju di sale è di
scogli neri.

Tutti morti suvrani è indipendenti.